

Taco Bell lo habri su portanan na Augustus

ORANJESTAD (AAN): Riba Sasakiweg, un poco panord di Eagle Bowling Center ta ser construi un edificio cu lo bira un restaurant di e cadena Taco Bell.

Como cu Taco Bell ta un restaurant completamente diferente di loke ta conoci na Aruba, DIARIO a busca mas informacion pa lectornan.

E fundador di e cadena Taco Bell, esta Glenn Bell a realiza na aña 1962 cu tabata tin hopi hende cu tabata cansa di e mesun hamburgernan den restaurantnan tipo "fast-food" y el a dicidi di trece algo completamente diferente.

Glenn Bell a haci uso di ecombinacion di sabornan den cumindanan mexicano cu tabata hopi conoci y popular na California, unda Bell tabata biba, y el a adapta nan na e gusto Mericano y asina crea un menu excepcional di cumindanan a base di ingredientenan fresco y saludable.

E menu aki ta inclui tacos, burritos, enchilladas, salada y pizza mexicano, mexi-melt, y diferente variacion riba e mesun platonan aki. Tur cuminda ta

worde sirbi segun gusto di cliente, por ehemplo, si e cliente no ta gusta cuminda pica, no ta pone pica. Si e ta gusta pica, e ta pidi ingredientenan picante na su smaak.

Naturalmente Glenn Bell tabata sa cu e bida moderno ta exige servicio rapido cu facilidadnan pa "drive-thru" y el a crea un sistema di prepara e cumindanan di un manera rapido

y cu consistentemente ta alcanza e standardnan halto di calidad Taco Bell.

E vision di Glenn Bell a bira un exito rotundo. Awe tin alrededor di 3.400 restaurant Taco

Bell na Merca y mas o menos 60 na Canada, Asia, Europa, America Central y den islanan di Caribe. Den e aña cu a pasa, di tur e cadenan restaurantnan tipo "fast-food", Taco Bell tabata esun cu mas a progresa. Na San Jose (Costa Rica) den e dianan aki lo habri di segundo restaurant Taco Bell, y mas den aña lo habri Taco Bell na Virgin Islands, Corea, Arabia Saudita, Quattar, y na Augustus na Aruba.

E restaurant na Aruba lo ta un explotacion di Campana Fast Foods N.V. di cual Clyde Harms y Russell Harms ta doñonan principal.

Russell lo ta gerente general mientras cu su esposa Jennifer Harms-Haskell tambe lo ta un di e directornan di e empresa. E edificio lo tin espacio pa 71 hende sinta paden, y lo tin un porch tambe unda 10 persona por disfruta di nan cuminda.

Banda di e restaurant lo bin un parque chikito di diverticion pa muchanan y patras di e edificio lo tin cuatro cancha pa Bolas Criollas. Tambe tin aparta un pida di e tereno pa un "batting-cage" cu ta planea den futuro cercano.

